

Je'ej ti ye'ej tyihuo'tayú'sej a'íjna i San Pablo a'íjma i maj Galacia jo'cháatima'caa

Pablo pu hua'tyojtye'

1 ¹Nyáaj i nyaj Pablo pué'een, camu i tyeítýee nyojo'ta'ítýaca' camu majta a'íimaj na'antyíhuoj, sulu a'íi pu i Jesús ti ajta Ciríistu' pué'een, ajta i Dios i ti tavástara' pué'een, i ti jaatájuurityej a'íjci i Jesús, ²néijmi'caa jamuán i nye'ihuáamua', yatuj já'muatyojtye' mua'ajmaj mu sij jusi'rii a Galacia. ³Che' i Dios ajta i tavástara' a'íjna i Jesús ti ajta Ciríistu' pué'een, miche' a'íin tyámua' tyajamuaatá'an, majta jamuaatyápua'ritye'en i já'muatzajta'. ⁴I Ciríistu' pu huatóoa' ti huámui'nyij tajitzé ma'can, tí'ij tajapúa huatányuunyij a'íjma jimi i maj je'ej pua'aj tyityetyúucha'ij i maj a'yan huacháatimee i cháanacaj japua, a'yaa pu tya'ajxié'vi'ra' i Dios i ti tavástara' pué'een. ⁵Tyiche' tyé'tyojtzire'ej i Dios jusén jime'. Che' a'yan tyá'ra'nyij.

Capu síij ajtáhua'aj majá'hua' i nyúucarij i ti jin i Dios tíi'rátoonyij

⁶Je'ej nu pua'aj tyo'tányamua'aj a'íjci jime' sij jiye'tzín ajtacíj i Dios jimi, i ti jamuaatajé ja'muaséeratya'aj i Ciríistu' jimi a'chu ti já'muaxie've', mua'aj xu sij seríj séej ántzaahuaj i nyúucarij. ⁷Majta quee capu síij ajtáhua'aj i nyúucarij séejre'. Sulu séecan mu séejre' i maj já'mua'itziitye', majta tyí'tyese' mej mij seequéj jáa'uurej i nyúucarij i Ciríistu' ti jaxaj. ⁸Ajta tipua'aj a'tíj seequéj tyajámua'ixaatye'ej i nyúucarij tiquee a'yan namuajre' je'ej tyaj tyeríj tyajamuáa'ixaa, che' i Dios puéjtzij jaatá'an, capu je'ej a'tíj ti pué'een tipua'aj nyáaj, na'ríij síij i ti tyí'huiire' u tajapúa. ⁹Nu'ríj anaqueej a'yan tyaataxájtaca' ajta ijíj nu nyajtáhua'aj jaataxájtaj. Tipua'aj a'tíj seequéj tyajámua'ixaatye'ej i nyúucarij tiquee a'yan namuajre' tí'ij i sij seríj ja'antzaahuaj, che' i Dios puéjtzij jaatá'an.

¹⁰Canu nyáaj a'yan tyá'huoo nyej nyij tyámua' tyu'tyá'itzeere'en i tyétyacaa jimi, sulu nyej nyij tyámua' tyu'tyá'itzeere'en i Dios

jimi. Canu a'yan tyá'huoo mej mij i tyétyacaa tyámua' nyojo'seejra. Típua'aj a'yan nyetyá'xie'va'aj maj a'íimaj tyámua' nyojo'seejra, canu che' a'íin pu'éen i ti jahuiire' i Ciríistu'.

Ciríistu' pu i Pablo antyíhuo

¹¹ Siata'aj a'yan tyáamua'reej nye'ihuáamua', i nyúucarij i nyaj já'mua'ixaatye' capu i tyeétyee jimi já'ma'can. ¹² Canu ja'ancuriáa' i tyeétyee jimi, capu ajta a'tíj naamuá'tyej, sulu a'íj nu jimi i Ciríistu' ja'ancuriáa', a'íi pu ajta naatá' nyej nyij jáamua'tyij.

¹³ Siajta mua'aj xu'ríj tyí'namuajraca'aj je'ej nyaj tyi'tyínyecha'iica'aj jájcuaj imuáj nyati'ij nyooj já'astyajca'aj i huá'yi'raj i maj Israel jitze ajtyáma'can, nyajta je'ej pua'aj huá'uuriajca'aj a'íjma i maj jusi'rii i Dios jimi, nyetyí'tyasa'ca'aj nyaj néijmi'caa antyipuá'ritye'en. ¹⁴ Jéetze' nu janamuajraca'aj i nyahuásimua'ci'ij yi'ráj, nyajta nu néijmi'caa mue'tijca'aj i nyaxa'aj tyeétyee i maj Israel jitze ajtyáma'can, a'íjci jime' i nyaj já'astyajca'aj i tayi'ráj. ¹⁵ Ajta ti'ij ja'ránajchaca' i Dios ti'ij na'antyíhuoonyij nyati'ij quee xu nié'huacaj, a'íi pu naatajé juxié'vi'ra' jime', ¹⁶ nyej nyij jáamua'tyij i yójra', nyajta je'en huo'té'exaatye'en i nyúucaria'ra' a'íjma i maj quee Israel jitze ajtyáma'can. Canu a'tíj jimi ja'tanyéj ti'ij a'íin tyináamua'tyej je'ej nyaj tyi'tíj jin huárinyij, ¹⁷ canu nyajta a'áa jo'mej a Jerusalén nyej nyij huó'muaarej a'íjma i maj anaquéej antyíhuaviihuaca' nyati'ij quee xu nyáaj, sulu je'en nu a'áa ja'tanyéj a Arabia, nyati'ij tányij huariá'raa a Damasco.

¹⁸ Ti'ij huéecaj nyinyi'ra'aj mu tyojo'ma'aj, aj nu nyij a'áa jo'mej a Jerusalén nyej nyij jáamua'tyij a'íjci i Pedro, hua'puaj iteerij nu nyij á'tyeej nyaj jamuán ajo'caj. ¹⁹ Canu a'tíj a' jo'séj ti hua' jitze ajtyáma'can a'íjma i maj antyíhuaviihuaca', a'íj nu'uj i Santiago i ti ihuáaria'ra' pu'éen i tavástara'. ²⁰ A'yaa nu tyajá'mua'ixaatye' tzáahuatyí'ra'aj jime' ti i Dios ajta jamua'reej nyej quee hue'tzij jin tyajá'muayu'se'ej.

²¹ Aj nu nyij tányij a'áa jo'mej i séej chuéj japua a'ájna a Siria, nyajta a Cilicia. ²² Majta a'íjma i maj Judea jo'cháatimee i maj majta Ciríistu' jimi séejre', camu nyamua'tyajca'aj. ²³ A'íj mu'uj nyúucarij namuajraca'aj tijin: "Í ti ará'tyeej je'ej pua'aj ta'uuriajca'aj, ijíj pu huá'ixaatye' i tyeétyee mej mij ja'antzaahuatye'en i nyúucarij ti ará'tyeej ja'antypuá'rityamu'ca'aj." ²⁴ Majta a'íimaj, tyámua' mu tya'tá'caria'aj i Dios nyéetzij jime'.

A'íi mu i maj tamuáamuata' japan hua'puaj ará'asej jaataxié'vej a'íjci i Pablo

2 ¹ Ti'ij arí a'yan tyoomá'caj tamuáamuata' japan muáacuaj nyinyi'ra'aj, nyajtáhua'aj nu a'áa jo'mej a Jerusalén a'íjci jamuán

i Bernabé, nyajta nu a'íj jo'ví'tij i Tito. ²A'áa nu jo'mej, ji'nye i Dios pu a'yan tyinaataséjra ti a'yan tyúuxie'va'ca'aj nyaj a'áa jó'me'en. A'áa nu nyij huó'ixaaj i nyúucarij i nyaj huó'ixaaty'e'sij a'íjma i maj quee Israel jitze ajtyáma'can. Avíitzij nu jin a'yan huaríj hua' jimi i maj tyihuá'íjtye', ta'aj ij huataséjre'en nyaj quee huáapua'aj nyana'aj tyí'muarie'ca'aj. ³Ajta quee capu a'yan tyu'ríj je'ej maj i séecan tyá'xie'va'ca'aj, ji'nye a'íjna i Tito i ti nyajamuáantaca'aj ajta hua' jitze ajtyáma'cantaca'aj i griego, camu a'yan tyaata'íj tí'ij ja'antyisíjchej i junavíj. ⁴Séecan i maj a'yan tyúusejrataj maj tajitzé ajtyáma'can, a'íi mu avíitzij jin utyájrurij ityájma tzajta', mej mij taa'eeve'en je'ej tyaj ye'ej tyityetyítacha'íiij i Ciríistu' jimi, mej mij majtáhua'aj ca'nyéjrij jin tyitaata'íjtye'en i nyúucarij jime' i maj jin ty'líjta. ⁵Catu huo'ta' mej mij taamué'tin, ji'nye a'yaa tu tyá'xie'va'ca'aj ti ja'mua tzajta' séjre'ej i nyúucarij ti ji'r'é'can jime' i ti jin Dios jamui'rátosij.

⁶Majta a'íimaj i maj huápu'íj juxie've', camu je'ej tyéejtyoj mej mij tyi'tíj jájcuan naaté'xaaty'e', ajta capu nyejitzé juxie've' a'tyán maj pu'é'een a'íimaj, ji'nye capu i Dios a'íj jin tyihuá'xíjtye' je'ej ti síj huas'é'rin. ⁷Majta a'íimaj, a'yaa mu tyáamua'reeri' ti i Dios a'yan tyinaata'ítyaca' nyej nyij huo'té'xaaty'e'en i nyúucaria'ra' a'íjma i maj quee Israel jitze ajtyáma'can, a'yájna tí'ij ajta a'íj tyu'ta'ítyaca' i Pedro, tí'ij huo'té'xaaty'e'en i nyúucarij a'íjma i maj Israel jitze ajtyáma'can. ⁸Ji'nye a'íjna i Dios a'íj ti huata'ítyaca' i Pedro a'íjma jimi i maj Israel jitze ajtyáma'can, a'íi pu cha'taj na'aj nyéetzij naata'ítyaca' nyej nyij a'íjma jimi ujó'me'en i maj quee Israel jitze ajtyáma'can. ⁹Ajta a'íjna i Santiago, ajta i Pedro, ajta i Juan, a'íi mu a'íjna jin antyúumua'reerica'aj mej mij huó'cha'íin i maj i Dios jimi séejre', a'yaa mu tyáamua'reeri' ti i Dios a'íjna jin na'antyíhuoj, ajta ta'aj ij ootámiteere'en maj meríj taataxié'vej, a'íi mu tyáamua' tyitajcha'íj muá'raa nyéetzij majta a'íjci i Bernabé, a'íi mu mij a'yan tyaaxá'pu'íntarej tyej tyij ityáj ujó'ju'un a'íjma jimi i maj quee Israel jitze ajtyáma'can, majta a'íimaj a'íjma jimi i maj Israel jitze ajtyáma'can. ¹⁰A'íi mu taatáhuaviiri' tyaj a'íjma ootámua'reej i maj quee je'ej tyéejviicue', a'íj nu nyij jin ootyényaca'an nyej nyij nyaxie'vi'ra' jin a'yan huárinyij.

Pablo pu jajtyá'xij a'íjci i Pedro a'ájna a Antoquía

¹¹Ajta a'íjna i Pedro, tí'ij a'áa ja'tanyéj a Antoquía, nyáaj nu jajtyá'xij, ji'nye a'íi pu tyi'tíj jin quee xá'pu'í' rijcaj. ¹²Ji'nye hua' jamuán pu tyí'cua'caria'aj a'íjma i maj quee Israel jitze ajtyáma'can, 'asta mana'aj quee séecan ará'aj i Santiago ti uhuojo'ta'ítyaca', aj pu'ij ajtáraa hua' jimi, ajta jaatapuá'citaca' i ti hua' jamuán tyí'cua'caria'aj, ji'nye huá'tzĩĩnya'ca'aj a'íjma i maj ja'antyisí'chej i junavíj. ¹³Majta i séecan i maj Israel jitze ajtyáma'can, camu



© 1996 David C. Cook

Gálatas 2:14-16

majta a'yan huaríj huatoojé'yacan jime', sulu a'yaa mu hue'tzij jin tyúusejrataca'aj a'yájna tí'ij ajta huaríj i Pedro, a'íj pu jin ajta i Bernabé tyo'tyóohue'tzej tí'ij ij ajta a'yan huaríj mati'íj a'íimaj. ¹⁴A'íj nu jin, nyati'íj huo'séj maj quee tzáahuatyí'ra'aj jin a'yan tyityetyúucha'iica'aj tí'ij tyé'ijta i nyúucaria'ra' i Dios, a'yaa nu nyij tyaat'éxaa a'íjci i Pedro metyi'séeracaj néijmi'i i tyeítjee tijn: “Muáaj paj hua' jitze ajtyáma'can i maj Israel jitze eeráanyej, a'yaa paj tyi'tyía'cha'íj mati'íj i maj quee Israel jitze ajtyáma'can, ¿ji'nye een jime' ca'nyéjrij jin a'yan pahuá'uurej a'íjma i maj quee Israel jitze ajtyáma'can, mej mij a'rá'astej i huá'yi'raj a'íjma i maj Israel jitze ajtyáma'can?”

Dios pu néijmi'caa tyu'túu'uunyi'raj i maj tyá'tzaahuatye'

¹⁵Ityáj tu a'íjma jitze eeráma'can i maj Israel jitze ajtyáma'can, catu a'íjma jitze i maj ootyá'itzeerej i Dios jimi. ¹⁶Tyajta ityáj, a'yaa tu tyá'mua'reej tiquee a'tíj jí'rénnya'aj huatyá'itzeere'ej i Dios jimi, tyij ajta néijmi'i ará'astej a'íjci i nyúucarij i maj jin tyí'ijta, sulu a'íi pu jí'rénnya'aj huatyá'itzeere'ej i tí tyá'tzaahuatye' i Ciriístu' jimi. A'íj tu jin tyajta ityáj tyá'tzaahuatye' i Ciriístu' jimi, ta'aj ij i Dios a'yan taatámua'tyij tyaj jí'rénnye'ej séejre', a'íjci jime' tyej tyá'tzaahuatye' i Ciriístu' jimi, catu i tyaj ja'rá'astej a'íjci i nyúucarij i maj jin tyí'ijta. Ji'nye capu a'tíj jí'rénnya'aj huatyá'itzeere'ej i Dios jimi ttipua'aj a'rá'astej a'íjci i nyúucarij i maj jin tyí'ijta.

¹⁷Ajta íjij, ttipua'aj a'yan tyetyá'huocaj tyaj jí'rénnye'ej huatyá'itzeere'en, a'yaa pu tyé'miteere' tyej tyajta ityáj á'itzeere', ¿nyiquij a'yan huatóomua'aj ti i Ciriístu' ca'nyíjra'aj taatá' tyej tyij je'ej pua'aj tyi'tyítacha'íj? Capu xaa nyu'uj. ¹⁸Ttipua'aj nyáaj tyi'tíj

naatyú'uunaj, nyajtáhua'aj nyij jaatyátaahuaj, nyáaj nu nyasiij pué'eenye'. ¹⁹ Ji'nye nyáaj nu huamuí' a'íjci jimi i nyúucarij i maj jin tyí'ijta, nyej nyij júurij huatyá'itzeere'en i Dios jimi. Nyáaj nu nyajta jamuán óotateehuaca' i Ciriístu', ²⁰ a'íj nu jin quee che' nyáaj júurij, sulu a'íi pu i Ciriístu' nye jimi júurij. Ajta i júuricamej i nyaj jin ijíj júurij, a'íj pu jin júurij i nyaj tyá'tzaahuatye' a'íjna jitze ma'can i yójra' i Dios, i ti naataxié'vej, ajta huatóotoj ti nyejitzé ma'can huámuí'nyij. ²¹ A'íj nu jin quee majuuriésij a'íjci i ti Dios jin juxié'vi'ra' naatá', ji'nye tipua'aj a'íjna i nyúucarij i maj jin tyí'ijta tyu'tá'care'en nyej nyij ji'rénnya'aj huatyá'itzeere'en, capu che' tyi'tíj huatyahuí're'nyijche' ti i Ciriístu' huamuí'.

I nyúucarij i maj jin tyí'ijta ajta i maj tyá'tzaahuatye'

3 ¹ Mua'aj mu siaj Galacia jo'cháatimee, capu já'muai'riitye' siaj tyi'tíj jo'itéej xá'ra'nyij. ¿A'tanyíj je'ej pua'aj jamuáaruuj? A'íjci i tyaj já'mua'ixaatye' a'íj tu já'muasejratye' i maj jó'tatee a'íjci i Jesús ti ajta Ciriístu' pué'een. ² A'íj nu'uj mua'reerimu' ja'mua jimi: ¿Nyi a'yan setya'ancuriáa' i júuricama'ra' i Dios a'íjci jime' siaj ja'rá'astej i nyúucarij i maj jin tyí'ijta, ca' a'íjci jime' siaj ja'antzaahuaj i nyúucaria'ra' i Dios? ³ ¿Nyi quij huápuí'ij quee já'muai'riitye' siaj yo'itéej xá'ra'nyij, ji'nye mua'aj xu seríj a'íjci jitze aróoca'nyajca'aj i júuricama'ra' i Dios, siajta ijíj a'yan tyá'xie've' siaj a'íj ará'astej i siaj jujíimua'aj siana'aj jájtyo? ⁴ ¿Nyi quee tyi'tíj je'ej tyajamuaatyáhuui i nyaj jéehua tyámua' naa tyajamuáa'ixaa? Capu je'ej tyí'riij tiquee tyi'tíj jin je'ej tyajamuatyáhuui're'en. ⁵ Tí'ij i Dios jamuaatá' i ju júuricamej, ajta je'en tyi'tíj huataséjrataca' i ja'mua tzajta', ¿ji'nye een jime' a'yan huaríj? Capu a'íjna jime' siaj ja'rá'astijrej a'íjci i nyúucarij i maj jin tyí'ijta, sulu a'íj pu jin i siaj ja'antzaahuaj i nyúucaria'ra'.

⁶ A'yaa pu cha'tána'aj i Abraham tyá'tzaahuatya'ca'aj i Dios jimi, a'íj pu jin i Dios tyámua' tyeetyájtoo, ajta ji'rénnye'ej jimi huatyá'itzee. ⁷ A'yaa pu'ij tyúuxie've' siaj jáamua'reej tíjin i maj ji'r'é'can jime' i Abraham jitze eeráma'can, a'íi mu a'íin pué'een i maj tyá'tzaahuatye'. ⁸ Jájcuaaj imuáj pu a'yan tyé'yu'si'huaca'aj i yu'xarij jitze ti i Dios a'yan ajta huo'támua'sij maj tyámua' een a'íimaj i maj quee Israel jitze ajtyáma'can i maj majta tyá'tzaahuatye', a'yaa pu tyaaté'xaatya'ca'aj a'íjci i Abraham tíjin: “Néijmi'caa nu i tyeétyee tyámua' tyu'tyátoosij a jitze ma'can.” ⁹ A'íj pu jin, néijmi'i i maj tyá'tzaahuatye', Dios pu tyámua' tyihuo'tá'sij jamuán a'íjci i Abraham i ti ajta tyá'antzaahuaj.

¹⁰ A'tyán maj a'íj jitze tyí'ca'nyej i nyúucarij i maj jin tyí'ijta, a'íjma pu puéjtzij huo'ta'sij i Dios, ji'nye a'yaa pu tyé'yu'si' i yu'xarij jitze tíjin: “Puéjtzij pu jaci'tyij a'tíj tiquee néijmi'i já'astijre' je'ej ti

ye'ej tyé'yu'si' i yu'xarij jitze i maj jin tyí'ijta.” ¹¹ A'íj tu jin a'yan tyá'mua'reej tiquee a'tíj jí'réenya'aj séejre' ti néijmi'i ará'astej i nyúucarij i maj jin tyí'ijta, jí'nye a'yaa pu ajta tyé'yu'si' i yu'xarij jitze tíjin: “A'íjna i ti naa tyí'tyevij, a'íi pu júurij huatyá'ítzeere'ej a'íjci jime' i ti tyá'tzaahuatye'.” ¹² Ajta a'íjna i nyúucarij i maj jin tyí'ijta capu a'íj jitze ma'can i maj jin tyá'tzaahuatye', sulu a'yaa pu tyá'xaj tíjin: “A'íjna i ti ja'astej i nyúucarij i maj jin tyí'ijta, a'íj pu jin a'yan tyi'cháaj ja'mej.”

¹³ Ciriístu' pu tajapua' huatanyúj, tí'ij quee puéjtzij táaci'tyij a'íjci jime' tyaj quee ja'astej i nyúucarij i maj jin tyí'ijta, a'íi pu tajitzé ma'can jaapuéjtzitariaca', jí'nye a'yaa pu tyé'yu'si' i yu'xarij jitze tíjin: “Puéjtzij pu jaci'tyij a'tíj ti mui'nyij jo'tatéehuaj i ciyéj jitze.”

¹⁴ A'yaa pu a'íjci jin tyu'ríj ta'aj ij huo'ci'tyij i Dios ti jin tyámua' tyihuo'tyátoosij, a'íijma i maj quee Israel jitze ajtyáma'can, tyata'aj tyij tyajta néijmi'i a'íjna jitze ma'can i tyaj jin tyá'tzaahuatye' ja'ancuriá'an i júuricama'ra' i Dios i ti jin tya'tóoratziiri'.

I nyúucarij i maj jin tyí'ijta capu jo'rio'uunaj i Dios ti jin tya'tóoratziiri'

¹⁵ Nye'ihuáamua', a'íj nu jamuaté'eexaatye'ej je'ej ti tyí'rinyaca i tyeítjee jimi, tipua'aj a'tíj tyi'tíj jin atóoratyij ajta jo'yú'xaj je'ej ti rinyij, capu í'ríj ti a'tíj jo'rio'uunaj nusu ti jéetze' jitzán tyo'yú'xaj.

¹⁶ Ajta íjíj, Dios pu a'yan tya'táratziiri' a'íjci i Abraham ajta i ti jitzán eeráma'can. Capu i yu'xarij a'yan mui'caa tyi'tyáxajta, sulu síj pu'uj i ti jitzán eeráma'can, a'íi pu'ij a'íin pué'een i Ciriístu'.

¹⁷ A'yaa pu huatóomua'aj i nyaj já'mua'ixaatye' tíjin: Dios pu tyi'tíj jin tya'tóoraj i Abraham jimi, a'yaa pu'ij ajta tya'róo'astej. A'íj pu jin i nyúucaria'ra' i Moisés tí'ij yan huataséjre a'yan tyoomá'caj muáacuaj anxityej nyinyi'ra'aj japuan seityéj japuan tamuáamuata', capu í'ríj ti i nyúucarij jo'rio'uunaj tí'ij quee che' tyi'tíj huiiria'aj i Dios ti jin tya'tóoraj. ¹⁸ Jí'nye tipua'aj i Dios ti jin tya'tóoratziiri', a'íj jitze aróoca'nyaj i nyúucaria'ra' i Moisés, capu che' a'íin pue'éenye'ej ja'mej i Dios ti jin tya'tóoratziiri', ajta i Dios pu a'yan tya'tóoratziiri' ti juxié'vi'ra' jin tyámua' tyeetyátoonyij a'íjci i Abraham.

¹⁹ ¿Tyi'tanyí na'aj ij je'ej tyí'huire' i nyúucarij i maj jin tyí'ijta? A'yaa pu hua' jimi tyu'tyátuihuaca', mej mij jáamua'reej i maj jin ootyá'ítzee i Dios jimi, 'asta na'aj quee huataséjre a'íjna i ti jitzán eeráma'can i Abraham, i ti jitzán i Dios tya'tóoratziiri'. Ajta i nyúucarij i maj jin tyí'ijta, a'íi mu i maj tajapua' tyí'huire' hua' jimi jaatyájtóo i tyeítjee, a'íjna jitze ma'can i Moisés. ²⁰ Ajta tí'ij i Dios a'yan tya'táratziiri' a'íjci i Abraham, capu a'tíj huata'ítyaca', sulu jusíj pu a'yan huaríj, ajta síj na'aj a'íin pué'een i Dios.

I ti jin tyí'huire' a'íjna i nyúucarij i maj jin tyí'ijta

²¹ ¿Nyiquij a'yan huatóomua'aj ti seequéj tyá'xaj i nyúucarij i maj jin tyí'ijta a'íjci i Dios ti jin tya'tóoratziiri'? Capu xaa nyu'uj, ji'nye tipua'aj i nyúucarij i maj tyí'ijta júuricamej tatá'care'en, a'yaa pu'ij tyi'rúitacaj tyaj ji'r'é'nye'ej huatyá'itzeere'en i Dios jimi a'íjci jime' tyaj ja'astej i nyúucarij i maj jin tyí'ijta. ²² Ajta a'íjci i yu'xarij jitze a'yaa pu tyá'xaj tyaj néijmi'i ootyá'itzee i Dios jimi, mata'aj mij a'tyán maj tyá'tzaahuatye' i Ciríistu' jimi huatái'riitarij maj ja'ancuriá'an a'íjci i ti jin Dios tya'tóoratziiri'.

²³ Ti'ij quee xu huataséria'caj i tyaj jitzán tyá'tzaahuatye', a'íj tu jin eetyánami'huaca'aj i nyúucarij i maj jin tyí'ijta, a'yan tyetye'ejcho've'ej ti huataséjre'en a'íjna i tyaj jitzán tyá'antzaahuatye'en. ²⁴ A'íjna i nyúucarij i maj jin tyí'ijta a'yaa pu tyí'tacha'íica'aj ti'ij i ti ca'nyéjrij jin tyí'muarie' ti'rúij ti tyiséjra, 'asta na'aj quee uvé'nye' i Ciríistu', ta'aj ij i tyaj jin tyá'antzaahuatye'sij taatá'an tyaj ji'r'é'nye'ej huatyá'itzeere'en. ²⁵ Ajta ijíj ti arí huataséjre i tyaj jitzán tyá'tzaahuatye', capu che' a'íjn tacha'íj i nyúucarij i maj jin tyí'ijta, ²⁶ ji'nye a'íjna jime' i sij jin tyá'tzaahuatye' i Ciríistu' jimi, néijmi'i xu mua'aj yójmua'mua' pué'een i Dios, ²⁷ ajta siati'ij jimi huatyá'itzee i Ciríistu' a'ájna siati'ij huái'huaca', aj pu ajta jamue'ré'chejtya'xij. ²⁸ Capu che' a'íjn juxie've' tipua'aj Israel jitze pua'ajtyáma'cantaj, na'rúij a'íjma jimi i Griego, tipua'aj i ti juxáahuaj majo'cha'can, na'rúij i ti ca'nyéjrij jin tyí'huire', tipua'aj tyáati' nusu íiti', ji'nye néijmi'i xu mua'aj i Ciríistu' jitze ajtyáma'can, a'íj xu jin síj siana'aj pué'een jimi. ²⁹ Ajta tipua'aj Ciríistu' jitze xa'ajtyáma'can, a'íj xu jin siajta a'íj jitze eeráma'can i Abraham, ajta a'íjn tyajá'muaci'tyij i ti jin Dios tya'tóoratziiri'.

4 ¹ A'yaa pu huatóomua'aj i nyaj já'mua'ixaatye' tijin: Ti'ij ooj pa'ri'istan a'íjna i ti néijmi'i tyá'ci'tyij, a'yaa pu cha'tána'aj een ti'ij síj ti ca'nyéjrij jin tyí'muarie', tyij ajta arí néijmi'i tyía'ra'an tyi'pué'een ² Séecan mu jacha'íj, majta a'íjna jin antyúumua'reej maj tyú'cha'íin néijmi'i i ti tyía'ra'an, 'asta na'aj quee tya'rá'astij a'náj ti i táatajra' a'yan tyaaxá'pui'intari'ri'. ³ A'yaa pu cha'taj ityájma jimi tyé'yi'ij, tyati'ij quee xu tyi'tíj mua'rériacaj, a'íj pu tyí'ta'ijtya'ca'aj íiyan ti tyí'sejre' i cháanacaj japua. ⁴ Ajta ti'ij atyojo'ré'nye' a'náj ti a'yan tyu'xá'pui'intari'huaca', Dios pu juyó'j ujo'ta'ítyaca', i ti huanie'huaca' i íitaj jitze, ajta a'yan tya'rá'astej i nyúucarij Moisés ti jo'yú'xaca', ⁵ ta'aj ij a'íjn tajapuá huatányuunyij, ji'nye a'íj pu tyí'ta'ijtya'ca'aj i nyúucarij i maj jin tyí'ijta, ajta je'en taatá'an tyej tyij huátatyamua've'en a'íjna jime' tyaj tyeríj yójmua'mua' pué'een i Dios. ⁶ Ajta tyaj tyeríj yójmua'mua' pué'een, Dios pu yo'ta'ítyaca' i júuricama'ra' i juyó'j i taxiéjnyu'caa tzajta', ajta i júuricama'ra'

a'yaa pu tyá'huoo tijin: “Muáaj paj nyatáataj pué'een, i nyaj jéehua jaxie've!” ⁷A'yaa pu'ij, capáj che' ca'nyéjrij jin tyí'muarie', sulu yójra' paj pué'een i Dios, ajta ijíj paj perij yójra' pué'een, Dios pu a'yan ty'a'jxié'vi'ra' pej pij néijmi'i jimi tya'ancuriáan.

Pablo pu je'ej tyóomua'ajcaa a'íjima jimi i maj tyá'tzaahuatye'

⁸Jájcuaaj imuáj, siati'ij quee xu jamua'tyáacaj i Dios, mua'aj xu ca'nyéjrij jin huá'huúria'ca'aj a'íjima i maj a'yan hua'tamuá'muaj tijin dioosij. ⁹Ajta ijíj siaj serij jamua'tyej i Dios, nusu ijíj ti arí i Dios já'muamuajtye, ¿ji'nye tyí'rij siaj sij siajtáhua'aj ca'nyéjrij jin tyu'tyáhuire'en a'íjci jimi i tiquee tyi'tj huire', ajta ti'ij ajtáhua'aj ca'nyéjrij jin tyajamuata'íjtye'en? ¹⁰Mua'aj xu tyí'ye'estyaa, ti'ijta a'ájna atyojo'r'é'nyej a'náj ti tyi'tj je'ej huarj, na'ríj i máxcirie' ti jitzán tyi'tj atyojo'r'é'nyesij, nusu i nyinyi'ra'aj i maj jitzán a'yan tyá'mua'reej tyi'tj jime'. ¹¹A'j nu jin jéehua tyí'tziinye' tipua'aj quee tyi'tj huatyáhuire'en i nyaj jin tyu'muariej ja'mua tzajta'.

¹²Nye'ihuámua', a'yaa nu tyaja'muahuavij siaj a'yan rijcaj nyati'ij nyáaj, ji'nye nyáaj nu nyajta a'yan tyi'tyínyecha'ij siati'ij mua'aj. Caxu siaj mua'aj tyi'tj jin ootyá'itzeerej nye jimi.

¹³A'yájna siati'ij serij tyá'mua'reej, nyati'ij anaquéj jamuaaté'exaa i nyúucaria'ra' i Dios, a'yaa nu tyi'cuí'ij nyati'ij a'yan huarj.

¹⁴A'jna i nyaj jin tyí'cui'ca'aj, jéehua pu jamuaatamuárie'ristej, siajta mua'aj caxu naataxána'vej, caxu siajta naatyáxaahuataca', sulu tyámua' xu tyinaatyéje ti'ij nyaj a'ín pué'eenye' síj ti tajapúa tyí'huire', na'ríj yaa ti'ij nyaj a'ín pué'eenye' i Ciriistu' ti ajta Jesús pué'een. ¹⁵¿Ji'nye huarj a'jna i siaj jin jutyamua'va'ca'aj? A'yaa pu tyí'rij nyaj a'yan tyaataxáj ja'mua jime' yee tipua'aj a'yan tyí'riitacajche', mua'aj xu je'tatú'tu'nyijche' i juji'sij siaj sij nyéetzij naatatú'tu'tye'en. ¹⁶Arí ijíj, ¿nyij serij nyéjcha'ire' a'íjci jime' nyaj tzáahuatyí'ra'aj jin tyajá'mua'ixaatye'?

¹⁷A'íjima jimi i tye'tyee jéehua xu hua' jitze juxie've', majta quee a'jna jime' mej mij tyámua' jamuáa'uurej. A'yaa mu tyá'xie've' siaj sij tajimí ajtáciinyej, siaj sij siajta mua'aj hua' jitze tyú'ca'nyej.

¹⁸A'yaa pu tyí'xa'pui' maj ja'mua jitze juxié'va'aj i séecan, siaj sij tyámua' huó'uurej, ajta a'náj tina'aj a'yan tyúuxie've', capu a'áa na'aj tipua'aj nyijta ja'mua jamuán a'áa jó'catyij. ¹⁹Nyiyóojmua', jéehua nu jajpuéjtzij ja'mua jime', a'yájna ti'ij i íiti' ti jo'tacuí'nyaca' pá'rí'ij jime', 'asta na'aj quee i Ciriistu' ja'mua jimi tyámua' tyu'tyá'itzeere'en. ²⁰Canu a'tzúj jamua'reej je'ej nyaj ye'ej huárinij mua'ajmaj jime'. Nyóoche' a'áa jó'catyiiche' ja'mua jimi nyej nyij quee che' tyajá'muayu'se'ej nyana'aj, sulu nyej nyij tyajamuáa'ixaatye'en senyeséeracaj.

**Je'ej maj huaríj a'íjna i Agar, ajta i Sara,
i tyaj jin yo'itéej tá'ra'nyij**

²¹ Siata'aj naaté'xaaty'e' mua'aj mu sij jaxie've' sij sij ja'rá'astyaj a'íjci i nyúucarij i maj jin tyí'ijta, ¿nyitzaa sequée a'yan tyáanamujri' je'ej ti tyá'xaj a'íjci jitze i nyúucarij? ²² A'yaa pu tyé'yus'i' ti i Abraham hua'puáca tyiyójmua'ca'aj i maj tyétyaca. Síij pu jitzán huanie'huaca' a'íjci i íitaj ti ca'nyéjrij jin tyí'muarie'ca'aj, ajta i síij, a'íi pu jitzán huanie'huaca' a'íjci i íitaj ti juxáahuaj jo'chá'canya'aj. ²³ A'íjna i ti huanie'huaca' a'íjci jitze i íitaj ti ca'nyéjrij jin tyí'muarie'ca'aj, a'íi pu a'yan éenye'ej huanie'huaca' mati'íj i tí'ríj. Ajta i síij, a'íjna i ti huanie'huaca' jitzán i íitaj ti juxáahuaj jo'chá'canya'aj, a'íi pu a'íjci jin huanie'huaca' ti Dios a'yan tya'tóoratziiri'. ²⁴ Iríj tyaj a'yan tyaataxáj ti a'yan huatóomua'aj a'íjna i nyúucarij ti a'yan tyé'yus'i'. A'íimaj i úuca i maj hua'puaj, a'yaa pu huatóomua'aj i nyúucarij ti hua'puaj ti jin Dios tyihuo'ta'íj i tyétyaca. Síij i nyúucarij pu a'áa já'ma'can i jiríj japua ti a'yan tyaja'rájtyapuaj tíjin Sinaí. A'íj mu jitzán eerányesij a'íimaj i tí'ríj i maj tyu'tyáhuire'sij ca'nyéjrij jime'. Ajta a'íjna i nyúucarij, a'íj pu'ricij a'íjna i íiti' ti a'yan ántyapuaj tíjin Hagar. ²⁵ A'íjna i Hagar, a'yaa pu huatóomua'aj a'íjna i jiríj i Sinaí, a'áa ti jo'tácaj a Arabia. A'yaa pu ajta huatóomua'aj chájta' ti já'sejre' a Jerusalén, ji'nye óoche' pu ca'nyéjrij jin tyí'muarie' jamuán i yójmua'mua'. ²⁶ Ajta a'íjna i Jerusalén tajapuá ti já'ma'can, a'íi pu juxáahuaj jo'cha'can. Ajta a'íi pu pu'éen i taj náanaj. ²⁷ A'yaa pu'uj na'aj ji'nye a'yaa pu tyé'yus'i' tíjin:

Pajta muáaj, tiquee che' muo'tacuí'nyij, pata'aj huatá'tyamua've'en.
A'yaa paj huárinyij, ji'nye jéehua paj tyiyóomua'aj puá'mej
mu paj quee a'náj ootájucataca'
quee a'íjna i íiti' ti víche'.

²⁸ Siajta mua'aj, nye'ihuáamua', a'yaa xu cha'taj siana'aj séejre' tí'ij a'íjna i Isaac ti a'íjci jin eerányej i ti jin Dios a'yan tya'tóoratziiri'. ²⁹ A'ájna imuáj a'íjna i yójra' ti a'yan cha'tána'aj éenye'ej huanie'huaca' mati'íj i tí'ríj, a'íi pu je'ej pua'aj jáaruuj a'íjci i yójra' ti huanie'huaca' a'íjci jime' i muárie'ria'ra' i júuricama'ra' i Dios. Ajta íjij, a'yaa pu cha'taj tyí'rinyaca. ³⁰ Ajta, ¿ji'nye tyá'xaj i yu'xarij jitze? Nyiquij a'yan yee: “Pata'aj jaatamuáritye'en a'íjci i íitaj ti ca'nyéjrij jin tyí'muarie', pajta i yójra', ji'nye capu a'náj tyi'tíj jaci'tyij a'íjci i yójra' i íitaj ti ca'nyéjrij jin tyí'muarie', sulu néijmí'i pu tyá'ci'tyij a'íjci i yójra' i íitaj ti juxáahuaj jo'cha'can.” ³¹ A'íj pu jin, nye'ihuáamua', catu a'íjci jitze eerányej a'íjci i íitaj ti ca'nyéjrij jin tyí'muarie'ca'aj. Catu xaa nyu'uj, sulu a'íj tu jitzán eerányej a'íjci i íitaj ti juxáahuaj jo'chá'canya'aj.

Maj quee tooa'care'en maj ca'nyéjrij jin tyí'huiire'ej

5 ¹Ciríistu' pu tii'rájtoó tyej tyij taxáahuaj mahuací'ca'an. A'íj xu jin caxu che' tooa'care'en siaj sij ca'nyéjrij jin tyí'muarie'ej, caxu che' huariá'ci'ca'an a'yájna siati'íj tyityaajú'ca'aj.

²Sianáanamua'jri'. Nyáaj i nyaj Pablo pué'een, a'yaa nu tyajá'mua'ixaatye'. Tipua'aj a'yan setyityaató'a'an maj ja'antyísiichixi'ín i ta'antyuuví'rajmee i siaj jitzán sa'racia, ti'íj tyá'xaj i nyúucarij maj jin tyí'íjta capu tyi'táj jin jamuaatyáhuire'ej i Ciríistu'. ³A'yaa nu tyaaté'exaatye'sij tzáahuatyí'ra'aj jime' a'táj tina'aj ti ja'antysisíjchej i junavíj, a'yaa pu jimi tyuuxié've'ej ja'mej ti'íj néijmi'i ará'astej i nyúucarij i maj jin tyí'íjta. ⁴Mua'aj mu siaj a'yan tyá'huoo siaj ji'rén'ye'ej huatyá'ítzeere'en i Dios jimi, mua'aj xu seríj ajtacáj a'íjci jimi i Ciríistu', siajta ajtacáj a'íjci jimi i Dios ti tyámua' tyajamuaatá'. ⁵Tyajta ityáj, a'íj tu jitze arataca'nyáaj i júuricama'ra' i Dios a'yan tyetyí'íjcho've'ej tyej tyij ji'rén'ye'ej huatyá'ítzeere'en i Dios jimi a'íjci jime' i tyaj jin tyá'tzaahuatye'. ⁶A'yaa pu tyí'een, ji'nye i Ciríistu' jimi, capu a'tzúj jitzán juxie've' tipua'aj a'táj arí ja'antysisíjchaca' i junavíj nusu quee. A'íi pu xaa jitzán juxie've' ti a'táj a'yan tyihuo'taxié've'en i tye'ityee tzáahuatyí'ra'aj jime'.

⁷Tyámua' xu seríj mua'aj tyityaajú'ca'aj i juyéj jitze. ¿A'tanyíj tyajamuantyí'uunyi'ri' siaj sij quee che' já'astyaj a'íjci i nyúucarij ti ji'rén'can jime'? ⁸Capu a'íin ca'nyíjra'aj jamuaatá' i Dios i ti jamuaatajé. ⁹A'yaa mu tyí'xaj ti cíira'tzuj i levaduura' néijmi'i tyináxcaj i cuéjtzij, ¹⁰a'íj nu jin nyáaj i tavástara' jitze tyí'ca'neye' siaj mua'aj quee seequéj tyí'mua'tyij, ajta i Dios pu puéjtzij jaatá'sij a'íjci i ti tyajamua'antiyí'uunyi', ajta quee je'ej rinyij a'táj ti pué'een.

¹¹Ajta nyéetzij jime', nye'ihuáamua', tipua'aj nyooj a'yan tyajá'mua'ixaatye'ej siaj ja'antyísiichixi'ín i junavíj, camu che' je'ej pua'aj nya'uurrényijche' a'íimaj i maj Israel jitze ajtyáma'can, ji'nye capu je'ej pua'aj hua'namuaaraste'ej ja'mej i nyúucarij nyaj já'mua'ixaatye' ti i Ciríistu' óotateehuaca' i cúruuj jitze. ¹²Ajta a'íjma jime' i maj a'íjci jin tyajamua'antiyí'uunyi', a'yaa pu tyina'ráanajchi nyéetzij maj anaquéj a'íimaj jujíimua'aj huatyóosiichixi'ín.

¹³Siajta mua'aj nye'ihuáamua', Dios pu jamuaatajé siaj sij juxáahuaj mahuací'ca'an. Ajta caxu a'íjci jin a'yan rijcaj siaj sij a'yan cha' siana'aj je'ej pua'aj rijcaj je'ej ti tyajamuá'miteeraste'. Sulu siata'aj juxie've' huatóohuire'en séej jamuán siajta séej. ¹⁴Ji'nye néijmi'i pu i nyúucarij i maj jin tyí'íjta séej na'aj jitze tyá'róo'aste' i ti a'yan tyá'xaj tijin: "Pata'aj jaxie've' i axa'aj tyévij a'yájna pati'íj asíj tyí'axie've'." ¹⁵Tyámua' xu'uj mua'aj, ji'nye tipua'aj mua'aj je'ej pua'aj setyúuxajta na'ríij siooj jujíimua'aj tyúucha'íire'ej, mua'aj xu sij jujíimua'aj antyúupa'ritye'sij.

**I ti tatzájta' eerányinyii, ajta i ti jitzán
eerányinyii i júuricama'ra' i Dios**

¹⁶A'íj nu jin a'yan tyí'xaj tjin: Siata'aj a'yan tyí'tyechajcaj a'íjci jitze xa'rooca'nyéej i júuricama'ra' i Dios, sij sij quee tyi'tíj jin je'ej pua'aj rijcaj i ti ja'mua tzajta' tye'rányinyii. ¹⁷Ji'nye je'ej ti tyá'xie've' i ti je'ej pua'aj een, a'íi pu jájcha'iire' i júuricama'ra' i Dios, ajta a'íjna i júuricama'ra' i Dios a'íi pu ajta jájcha'iire' i ti je'ej pua'aj een. A'íi mu a'yan tyityetyúucha'iire', a'íj xu jin mua'aj quee a'náj a'yan rinyij je'ej sij tyá'xie've'. ¹⁸Ajta tipua'aj i júuricama'ra' i Dios tyaja'muamua'tyej, capu ij che' mua'ajmaj tyaja'mua'íitya'aj ja'mej i nyúucarij i maj jin tyí'ijta.

¹⁹Tyámua' pu tyé'miteere' je'ej maj ricij a'íimaj i maj ja'astej i ti je'ej pua'aj een, a'íi mu juxana'cire' séecan jamuán i maj quee jatyévi'tin, huápu'íj mu xána'visi' ricij a'íj mu mij jin meríj jó'vej, ²⁰a'íi mu hua'najchej i saánturij, majta tyí'chahuaa. Jéehua mu juxana've', majta quee tyámua' ja'huóomua'raj, majta óochueere'. Jéehua mu tyo'cájaaxiejeve', majta séecan jaaxiejtje', majta jé'ta' huaci'íj, majta séecan jimi ajtyú'uuej. ²¹Jéehua mu tyihuá'chueere', majta juta'rujve', majta tyí'nyacua'aj, majta néijmi'i jin a'yan ricij i ti je'ej pua'aj tyí'een. A'yaa nu nyij mua'ajmaj tyajá'mua'ixaatye', a'yájna nyati'ij nyáaj nyeríj jájcuaj imuáj huaríj, tjin i maj a'yan tyityetyúucha'ij camu ujo'tyárutyij jo'tij i Dios tyejé'ijtaj.

²²Ajta a'íjna i júuricama'ra' i Dios ti tyihuatá'caa, a'íi pu a'íin pué'een tyej tyámua' tyihuojó'mua'raj, ajta tyámua'vi'ra'aj, ajta tyaj taxáahua'j séjre'ej, tyaj néijmi'i jin tyo'táviicue', tyajta huoxié've'en séecan i tye'ityee, tyajta tyihuo'tapu'éjve'en, tyajta quee tyi'tíj jin á'itzeeria'aj, ²³tyaj quee á'tatzaahuatye'ej, ajta hua' jitze séejre' i ti xá'puí'. Capu ij ajtáhua'aj síj séejre' i nyúucarij ti tyi'tíj jin hua' jitze pua'ritye'ej. ²⁴Majta i maj jitzán ajtyáma'can i Círístu' ti ajta Jesús pué'een, mu'ríj néijmi'i tyu'táxaahuataca' i ti je'ej pua'aj tyí'een ti eerányinyiica'aj i hua' tzajta' mej mij quee che' je'ej pua'aj tyityetyúucha'íij. ²⁵Tipua'aj a'íj jin tyajúurij i júuricama'ra' i Dios, tyiche' tyajta tyu'tá'an tí'ij i júuricama'ra' i Dios tu'cájuyetyej.

²⁶Tyiche' quee á'tatzaahuatye'ej, tyajta quee ca'nyíjra'aj tatá'care'en tyej tyij je'ej pua'aj á'tamua'raj nusu tyej tyij tajíimua'aj tyítajaaxiejvi'.

Miche' huatóohuiire'en síij ajta síij

6 ¹Nye'ihuáamua', tipua'aj séej a'tíj xaaséj ti ootyá'itzeere'en tyi'tíj jime', siata'aj mua'aj mu sij i júuricama'ra' i Dios jitze aróoca'nyej jaatáhuire'en. Ajta siati'ij a'yan huárinyij tyámua' xu'uj sij sij quee a'yan cha'taj siana'aj tyityo'tyá'itzeere'en tí'ij a'íin

tyo'tyá'itzee. ²Siata'aj huatóohuiire'en séej jamuán siajta séej, a'yaa xu sij a'íjci jin tya'rá'astej i nyúucaria'ra' i Ciríistu'.

³Tipua'aj a'tíj a'yan tyé'miteeraste'ej ti tyi'tíj jin antyúumua'reej, ajta quee tyi'tíj jin antyúumua'reej, a'íi pu jusíj jucuanamuj. ⁴Che' síj ajta síj jusíj huóosej je'ej ti tyi'tyúucha'ij, ajta tipua'aj tyi'tíj jin óotzaahuatya'mui'ij, che' a'íjna jime' je'ej ti jusíj tyi'tyúucha'ij, che' quee i séecan jime'. ⁵Ji'nye a'yaa pu tyúuxie've' ti síj ajta síj a'yan tyó'viicue' je'ej ti tyi'tíj tyá'muarie'riste'.

⁶A'íjna i ti jumua'tyej i nyúucaria'ra' i tavástará', a'yaa pu tyúuxie've' ti jaatyáhuuie're'n a'íjci i ti tyá'mua'tyej.

⁷Caxu mua'aj jucuanamuj, capu i'ríj siaj jáacuanamuj i Dios. Tyi'tíj siaj mua'aj tyu'tá', a'yaa xu cha'taj siana'aj tya'ancuriáa'sij. ⁸A'íjna i a'tíj ti a'íj jimi tyi'muarie' i ti je'ej pua'aj een, a'yaa pu tyá'ci'tyij ti huámui'nyij. Ajta a'tíj ti a'íj jimi tyi'muarie' i júuricama'ra' i Dios, a'íi pu i júuricama'ra' i Dios jaatá'sij ti júurij já'ra'nyij jusén jime'. ⁹A'íj tu jin tyiche' quee jaxaahuataj i tyaj jin xá'pui' ricij, ji'nye tipua'aj tyequée jaxaahuataj tyi'tíj tu ancuriáa'sij a'ájna xicáara' jitze je'ej ti tye'tyéviyite'. ¹⁰A'íj pu jin, a'náj tyaj a'yan tya'ajxié'vi'ra'aj, tyiche' tyámua' huó'uurej i taxa'aj tyeítsee, tyajta jéetze' tyámua' tyihuó'cha'íin a'íjma i maj majta tyá'tzaahuatye'.

Maj tyámua' tyeeséj ti'ij quee a'tíj huo'cuanamuan

¹¹Tyámua' xu mua'aj tyeeséj je'ej nyaj va'cán jin tyé'yu'xaj i nyamuáca' jime'. ¹²A'íimaj i maj já'mua'itziitye', majta a'yan tyí'tyese' siaj sij ca'nyérij jin ja'antysisíjchej i junavíj, a'yaa mu ricij mej mij i tyeítsee tyámua' huojosejra camu jaxie've' ti puéjtzij huo'ci'tyij a'íjci jime' maj ja'rá'astej a'íjci i Ciríistu' i ti óotateehuaca' i cúruuj jitze. ¹³Ajta a'íimaj i maj ja'antysisíjchej i junavíj, camu ja'rá'astyaa i nyúucarij i maj jin tyí'ijta. A'yaa mu tyá'xie've' siaj mua'aj ja'antysisíjchej i junavíj, mej mij a'íjci jin ahuóotzaahuatye'en siaj a'íjci jin a'yan huaríj. ¹⁴Nyajta nyáaj canu tyi'tíj jin á'nyatzaahuatye', sulu a'íj nu jin á'nyatzaahuatye' ti Ciríistu' nyej jitze ma'can jaapuéjtzitariaca' i cúruuj jitze. Ji'nye a'íjna jitze ma'can i cúruujra' i Ciríistu', capu che' i cháanacaj nye jimi séejre', nyajta nyáaj canu nyajta che' i cháanacaj japua séejre'. ¹⁵Capu tyi'tíj huúie' tipua'aj a'tíj ja'antysisíjchaca' i junavíj nusu quee, a'íi pu juxie've' ti a'tíj jájcuán jin huanie'huaj i Dios jimi. ¹⁶Che' Dios huo'tyápua'ritye'en, ajta hua'ancu'vajxi'ín a'chu maj pua'máj ja'rá'astej a'íjci i nyúucarij, majta néijmli' i maj Israel jitze ajtyáma'can i tyeítteristyamua'me'en i Dios.

¹⁷Ijíj ti yujo'que'tíj ja'mej canu che' jaxie've' ti a'tíj nya'itziitya'aj, ji'nye pu'ríj nye jitze séejre' a'íjci jime' i nyaj jajpuéetzij i Jesús jitze ma'can.

¹⁸Nye'ihuáamua', che' i tavástará' i Jesús ti ajta Ciríistu' pué'een, che' a'íin tyámua' tyajamuaatá'an i ja'mua tzajta'. Che' a'yan tyá'ra'nyij.